

## Paoroe Ooka Simiyame Tesaronika Iyojurewa

### *Teepotari*

<sup>1</sup> Kúíra, Tesaronika tiopachi mochikame. Ka'karuma mochisaa eemea kaawe enemiipua. Teemea i'wao, ka'karuma mochikamepua. Nee Paoroa Siriwano ahjamao Timoteo tiameo, i'ka aamowichio iyoteria uhjuriamepua, yooma aamo Tesaronika tiopachi mochikame, taamo Noonno Riosichi te'teriamo, Apoe taamo Paamira Riosie Weratiamechi te'teriamo. <sup>2</sup> Neeea yooma aamo taamo Noonno te'pa kahtieme Riosio, taamo Paamira Eesusio tiameo, te'ta kaawerumari amochi teerejeraninia, te'ta ta'iria mochiwa amochi teeretetoka.

### *Paoro kaaweruma te'terewata Tesaronika Eesusichi paparame*

<sup>3</sup> Teemea senepi taamo Noonochi naewaiio, tísia kaawe tiio erakoamepua cheriwema kiapuaio, tísia kaawe aamo teetopa taamo Noonochio, te'ta utewaeme teetoka Eesusichi aamo paparao, amochi nakiraopua tiameo, tísia kaawe te'teretopa. <sup>4</sup> Teemea ahkai ti'tiopachi asiyaio, kaaweruma aamo nayewame teemea, aamo Eesusichi paparaopua, kiisi se'wika teetoamekopua aamoopua pukaichio, ki ookapi a'chi tiame na'arari yoraniame aiwaio, anachaka nokisiaio. <sup>5</sup> Nape Riosia yooma aamo ehpiami Eesusiwichio aiwaka mochitoao, kajuyachi taawechi ahpo katewiachiopua wa'asio, tísia kaawe aamo erapatemeripua, tísia kaawe iintoka aamowichioo, ahpo ye'karichi mochipatekao. Wa'a iintoka Riosia, tísia kaawe

2 Tesaronika Iyojurawa 1:6 2 Tesaronika Iyojurawa 1:12

ahpo iintuameko, tetewitemapua. <sup>6</sup> Nape aamo na'areka aiwatekameo, ki ahpo ye'karichi reesisemapua ohjoremichioo, ohsotia puuuu, tísia kokosarichi aiwaniachikamera uhjurameripua pu'kao. Wa'a iintokao Riosia, te'ta ahpo kaaweruma tiia tetewitemeripua, wa'a yoraniame nakiriamekopua nanaarameo. <sup>7</sup> Wa'a iintosoopua Riosi waanamio, kiteremeru eemea ihtaoi aamo aiwaniameo, wa'achitia tiame taamooi. Wa'a teeremeripua, te'ta Rosie Weratiame enasoopua, ahpo tewekachi ku'kuiwa ahjama eenoiopua, Apoe te'ta ahpo utewari teetoka eenoiopua. <sup>8</sup> Pu'ka taawechi eenaiio Eesusia, tahpitika teetoka enameripua na'ietoka, pukae na'ie ma'chitamiaopua kiisi kaawe nokitiameopua. Wa'a iintosaapua kiisi kaawe noonoikameopua, yooma ki Riosichi paparanarekameo, taamo Paamira Eesusichi simiyame tuuyewari ki nakiriameoiopua, ki nu'uti kokosameripua pu'kao. <sup>9</sup> Ihji kokosaria, ki nu'uti teeremeripua, ahkasi ki seenampasi tiame. Puuuu, kai waapi mehka ihpapapuamepua Riosichio, ki Riosi te'ta peenia tiiachikamera, Riosi utewarioi kihta teewewiachi. Puuu ki ka'karumaa wa'a itipimeripua wa'asi, ahkasi ki wahjiamesi seenampa. <sup>10</sup> Nape eemea pu'ka taawechi Eesusi enasoopua, yooma wahjachi tiame Eesusichi paparakame ahjamao, tísia kaawe erakowa wiikemapua Eesusio. Wa'a noonoiomeri eemea wiikekao, yooma eeme Eesusichi paparakamea, taamo Eesusichi simiyame aamo nayewaturia pichikeka inamukamea. <sup>11</sup> Pukaepa teemea, ehpe taawechiamio, Riosichi itasiame teemea aamo ku'ipuaichioo, Riosichi te'ta aamo kaawe te'teretopuawichio, pu'kawichio apochi aamo paaekamekopapua. Teemea Riosichio itianiamepua tiameo, aamo ku'isimichioopua ahpo utewarioe, yooma aamo itapiti Riosichi paparawa nokisinarekewachioopua. <sup>12</sup> Pu'ka wa'a aamo nokisisoo, yooma aaata aamo Eesu-

2 Tesaronika Iyojurawa 2:1 3 2 Tesaronika Iyojurawa 2:5

sichi simiyame aamo masiteria pichikekamea, pu'ka aamo noonowiriae, ki nu'uti iyoriva chaachapameripua Eesusichio. Aamoo kaawe noonowiriopa tiameo, Eesusia pu'kawichioo, ki nu'uti kaawe aamo iintomeripua. Wa'a iintokaopua Riosia Riosie Weratiamea tiamea, ki nu'uti aamo nakiya tetewitemapua.

## 2

*Ki pichiwa masitiame enechi enaniame Eesusichi simiyameo*

<sup>1</sup> Ehpeo aamo no'o Riosichi tetejima, Eesusi enamerichi simiyame aamo nayewemania, aachin teeremerikopua wahka ihtoriachiopua, Eesusi ahjama taamo mochipamioiopua, Eesusi enasoopua, ahpo ye'karichi i'tomia. <sup>2</sup> Nee, ka'te ikanati aamo sewina erapamitia aataeoiopua, taamo Paamira Eesusi enamiachio asikameko wa'asi, aamo chaachapanioiopua, pe'yachi ahpo masitiao, Riosi Riosiarie ahpo masitiameko tuuyoio, pe'yachi taamo masitia iyojurachi uhjureria masitiameko tuuyoiopua. Kiisi pichikepuapua wa'a chaachapoio. <sup>3</sup> A'chikoitia yoraniao ka'te aamo toimitia eemea aamo wisikuepawichioo. Yooma wa'a aamo chaachapamea, aamo wihkuame enemeripua. Ke'chu Apoe Eesusi eenoio i'ka weechi yawichitumiao, aata Te'ta Tatakori Ihsiamera machenameripua ti'tijoechio, ki teesa tiame na'arari iintomia. <sup>4</sup> Puuu Na'araria machenasacheopua i'wa weechio, ki nu'nuti mehtanameripua ti'tijoechio, yooma ihta eerina teereniame Riosichi simiyameo, Riosichi paparaniameopua. Puuuu yooma u'yemapua ihtaio Riosichi iyoriniameo, ahkasioi Eerusarenio, Riosi te'ta tioparachioi yasipamapua, apoekamerako tuuka te'ta Riosio. <sup>5</sup> Neeea i'ka wa'a tiame ikipuameo,

2 Tesaronika Iyojurawa 2:6 4 2 Tesaronika Iyojurawa 2:12

aamo tuuyekame neeepa aamo mochikachi ihsiriaio. Pukaepa nane'riame eemeapa wahka ihtoriachi wa'a ikipuameopua. <sup>6</sup> Pukaepa nane'riame eemeapa tiameo, ihtana eerina tiopua pehjo, pu'ka na'arari tijoe ki machenamichioo, pu'ka aamo nayewekame neeea, Eesusichi paparakame apechunapuame aamo nayewiaio. Puuu te'ta na'arari tijoe ki machenameri puuu ke'chu reeseri kianioopua Riosieo. <sup>7</sup> Puuu na'arari tijoea ki machenaioopua pehjo, o'inekame puuupa aho na'arari ihsiaeopua i'ka wehjoarichio, ahkasi yooma apechunaniachisi i'ka wehjoarichi aho Riosie eina teereweniaio. <sup>8</sup> Pu'ka aho eina teerewa apechunatiaapapua, waika machenameripua te'ta na'arari tijoeturia, ti'tjoerichi na'ara iintomiaio. Nape Eesusi Riosie Weratiamea tepepi neipamiopua, apoe ki nu'uti utewari teetoka enasaopua, kiisi tehki e'raka newitomapua pu'ka tisia na'arameo, itapiti puupuchekamechitia. Wa'a iintokaopua, yooma u'yemapua pu'ka tisia utewarirao. <sup>9</sup> Nape ke'chu Eesusie newitoniaioopua na'araria, ihji machejenasaopua ti'tjoerichio, yooma ihta utewari peenia ihsiwa inisimapua, Satanasio aho kiatia, pukae wihkuesimapua ti'tjoeo ooweruopua tiame, ki Riosi te'ta pichiware tuuyewarikamera, pichikemichioopua. <sup>10</sup> Yomatame ti'tjoerio, pu'ka peenia ihsiwa wihkuaeopua, apochikamera paparapatemapua, apochikamera iyoritekaopua pu'kao. Nape Riosia, pu'ka Satanasio wihkuetiameopua, tisia kokosamapua pu'kao, kai waapi uhjurakaopua ki apochi, ki ahpokamera pichikeriopia aho pichiware chiiio, aho Taana Eesusichi simiyameopua aho ahjae newipatepuao. <sup>11</sup> Riosia ki aho Taanachi simiyame pichikenareriopao, na'ararichi toimeripua, wihkuarichi. <sup>12</sup> Riosia ki

ahpo pichiwarikamera pichikeriopao, pu'ka na'arari wihtukikamera pichikeriopao, ki reesisemeripua pu'kao, ahpo Taana Eesusi ye'karichi mochimichioopua, pu'kao tísia pu'sereriopaoopua kiisi kaawe ahpo nokiwao.

### *Riosie newipamichio paaeniame*

<sup>13</sup> Teemea senepi Riosichi nayewaio, aamowichio cheriwema ki'yame teemea Riosio, eemekamerakopua pahcha Eesusichi paparakameopua wa'ao, taamo aamo mochikachi nokayoioopua Eesusichi simiyame nayewatukao, Riosio ahpo Riosiwario, apochi aamo paajutioioopua newipatemiao. Riosia ahpo ijinuwa iintapakamepua, ki aamo aiwamichioopua ahpo kokosario.

<sup>14</sup> Riosia ahpo kaaweruma tuuyewari taamoe aamo nayewioioopua, ahpo Taana Eesusi tísia peeniatiame ye'karichi, mochimichio aamo paaekamepua. <sup>15</sup> Wa'a tiichipa eemea, wa'api te'teretopuapua aamo Riosichi paparaka nokisiao, kaawe inatatoka wa'a taamo masiteriaopua, neipami taamo aamo masiteriaopua tiame iyojurae. <sup>16</sup> Ehpeo taamo Riosichi tetejimao, aamo inatepajerani neeea, taamo Noonoe tewekachi kahtiaameo, tísia taamo nakika yasitoamekopua pu'kao, Apoe Eesusi tiameopua, taamo Noonoe Weratiamea. Wa'a tiame yasitoamekapa puuua tamochio, ki wahjiamesi taamo ki'yakamepua kaawe erapario, ki nu'uti kaawe e'raka taamo puuyeka mochitomichioopua, ahpo ki teesa peenia tiamechi taamo mochipuame, Riosi taamo mochiwamio tuuriachi. <sup>17</sup> Neeea taamo Noonoe Riosio, taamo Paamira Eesusi tewekamepua tiameo, aamo utewaeme ku'imichio itaniamenia pu'kao, aamo pewatiame mochitomichioopua Riosichi paparao, kiisi se'wi nokaka ki kaawerumachio, ihtaoi se'wi ki kaaweruma nayewaniamechio.

### 3

#### *Taamowichio itamitia Riosichio*

<sup>1</sup> I'ka iyojura kuwatewachio, no'o Riosichi tetejima, taamowichio Riosichi itajerani teemea, taamo ku'isimichiopua pu'kao, ikanati yomachiami i'topuawichiopua, i'ka Eesusichi simiyame ka'karuma tuuyewario. Riosichi itamitiapua tiameo, yomachiami ti'tijoe ooweru tiameo, i'ka Riosi tuuyewari inamukameo, kaawe e'raka apochi uumichiopua pu'kao, amochitia pu'sereka uuriachitia.

<sup>2</sup> Taamo Noonoo te'pa kahtiamenchio, taamo neesetowa itapuapua tiameo, taamo kaawe inatemichio tísia nanaarame ti'tijoechio, kiisi taamo keepunariameopua i'ka ka'karuma tuuyewari Eesusichi simiyameo, taamoo nayewesiao.

<sup>3</sup> Nape wa'atiaoi ki ookapi nanaarameo ki Eesusichi paparanariamekoipua, ahjachi erakoame teemea taamo Noonochio, Apoe inisimerikopua, aamo Riosichi paparakame inatetokao, aamo Eesusichi paparakameo pewatiame mochtomichiopua.

<sup>4</sup> Riosichio teemea kaawe erakoamepua, aamoo kaawe teetoamekopua taamo masiteria nokisikao, ahjachi erakoame teemea Riosio, aamo ku'isimerikopua pu'ka aamo nokisiwachi masitekao.

<sup>5</sup> Nee Paoroa taamo Noonoo, aamo ku'ijerania pahtemichioo, ihtana keenakosi tísia aamo nakiyamekoopua, tewekachi taamo Noonoo. Neeea taamo Noonoo aamo ku'ijerania tiameo, Riosie Weratiamee aamo anachasimichiopua, yooma ihta aiwari aamo ikisiaopua.

#### *Ki nanasiname enepuame*

<sup>6</sup> Ehpeo taamo te'pa Noonochi poponiwao pipiniwaopua tiameo, neee Eesusie weratiamechitiao, i'ka aamo utewa chaaniamepua. Poanatumitia eemea wa'a mochikame nanasinamechio, kiisi tekipanaka

2 Tesaronika Iyojurawa 3:7 7 2 Tesaronika Iyojurawa 3:14

mochinariamechio, kiisi i'yaka mochikamechiopua ahpo ko'kometio. Puuu wa'a nokayamea, kihta yooraka mochitoamepua Riosi nuurario, Riosioio, kiisi iyoriamepua. <sup>7</sup> Eemea nane'riamepua taamoo, te'ta taamo teeretomechitia teetoriopua, kihta nanasinaka taamo nokisiriopua wa'ao, taamo ihtaoi nakiwiao tekipanaka i'yasiriopua. <sup>8</sup> Teemea wa'a mochikaio, tekipanakache i'yakamepua taamo ko'komiao. Teemea aaataoi ki ko'konekamepua ki tarakao, ohsotia teemea tarakache ko'kakamepua, ki peterenariapa amochio, tekipanakache koaka. <sup>9</sup> Aamo ihkorewa itaka koaka mochtokame enesaoi teemea, ka'chi teeremii teemea, Eesusie ajawatiamekapa teemea, ahpo tehkiwachio. Nape ki wa'a teerekame teemea aamoekamera taamo ko'kotepuaoi, aamoo taamo ki nanasiname tetewapa, tamochitia ki nanasiname enemichioopua. <sup>10</sup> Wa'a mochikaio teemea, utewaeme eee aamo chaanekamenia: "Aaata ki tekipananariameo, kiisi kianurekamenia kooameo." <sup>11</sup> Wa'a aamo chaaniamenia i'kao, wa'a aamo mochikachio aaata ti'tijoe ooweruopua tiame, oowera ki tekipanaka ko'konariameko tuuwamekopa, oowera ta'pechimiache ohjokache ihkorikache konariamekopua. <sup>12</sup> Pu'ka nanasiname ti'tijoeo ooweruoiopua tiameo, utewaeme chaaneka tekipananuriamenia, Riosie Weratiame tuuyachitia pu'kao, tekipanaka yowika ko'konuriachitia pu'kao, ki aaata kichiwa nokaka wa'ami ahkao, aaata ta'pechiamio. <sup>13</sup> Eeme wahjachi no'o Riosichi tetejimaio, ki nanasinapaka mochitojeraninia, ihtaoi te'ta ka'karuma aamo aaata yorasikiaopua. <sup>14</sup> Wa'a aamo tiopachio, kaawe ne'nepuapua wa'ao, aatanakamerakopua, ki yooreka mochtotonariameo i'ka iyojurachi no'o chaaniaio. Ka'te ahjama teeremitiapua pu'kao, ohso kaawe ipaka teteipuapua pu'kao, suuwe

2 Tesaronika Iyojurawa 3:15 82 Tesaronika Iyojurawa 3:18

erapamichiopua pu'kao, ahpo ki kaawe nokayao.  
<sup>15</sup> Nape wa'a te'tioi pu'ka nanasinameo, ka'te aamo seepurawachitia tetewimitiapua, ohso kaawe aamo Riosichi tetejimachitia uupuapua, kaawe e'raka utewaeme tuuyeka, pu'ka ahpo ki kaawe nokayao, kiisi kaawe e'raka tetewamekopua Riosio.

*Kajuyachi teepotari*

<sup>16</sup> Ehpeonia Apoe taamo Paamiraonia, yooma ihta aamo ta'iria yasitia, amochi teerepajeraninia pu'kao, ahkasi aamo weritoachi taawechisi, aamo ahjama oijeraninia taamo Paamirao.

<sup>17</sup> Kajukamenia neeeapa no'o chanimiao. I'wa iyopumane no'o teewa, aamo nane'remichiopua i'ka iyojura, noochi o'inia eenamekopua. Wa'a teeka no'o teewa iyopusa uhjuramenia, yooma no'o iyojura uhjurasiopua.

<sup>18</sup> Ehpeo Apoe Paamira Eesusi Apoe Riosie Weratiameo, yooma amochi Tesaronika tiopachi mochikamechio, te'ta ta'iria mochiniameteewejeraninia amochio.

Wa'asi ihjia. Wa'a aamo teewesaa Riosia, tísia kaawe enemapua.



Riosia Warijio Nayewani Ahpo Tisiwa Kaaweruma  
Tuuyewari

Huarijío: Riosia Warijio Nayewani Ahpo Tisiwa Kaaweruma  
Tuuyewari New Testament

copyright © 2014 Wycliffe Bible Translators, Inc.

Language: Huarijio

Contributor: Wycliffe Bible Translators, Inc.

All rights reserved.

2020-11-17

---

PDF generated using Haiola and XeLaTeX on 14 Jun 2022 from source files dated 1 Jun  
2022

c8002ff9-eafc-5d29-b2c7-a847cdca6c74